

## Manuel Regal Ledo

### Xuntos facemos pobo

Edicións de autor. 166 páxs.

O 8 de Setembro do 2001, día no que se celebrou en Allariz a Romaxe de Crentes Galegos, alumeaba este novo libríño. O autor é sobradamente coñecido por moitas e moitos que andamos trala procura de materiais, ferramentas e axudas. Todo é pouco para desde o noso ser cristián e galego expresar máis axeitada e coherentemente a nosa fe e celebra-la vida.

A obra estrutúrase en catro capítulos.

O primeiro leva por título *Credo da Aldea*. Consiste nunha formulación comentada do credo en que “fe” e “vida” mestúranse harmoniosa e vivencialmente, feito que axuda a que a profesión de “fe” chegue mais aló do “intelecto” e deite copiosamente da quentura do corazón.

A segunda parte titúlase “Celebrando a nosa fe”. Un xeitoso feixiño de materiais para celebracións de distintos momentos do ano litúrxico.

O terceiro capítulo: *No fio dos días*. Xa o título resulta enormemente suxestivo, para entender de qué vai.

É unha colleita de oracións que brotan a carón dos pequenos ou grandes momentos que entretécidos van marcando o acontecer dunha vida.

Fe e acontecemento mestúranse, apértanse. Transcendencia e encarnación, man a man, paso a paso...

Remata cun cuarto capítulo que ven ser unha escolma de pregarias e contos que animan a celebración da festa de San Cidre que ano tras ano organiza o Movemento Rural Cristián.

Todo isto formulado, como di o autor, “desde a realidade do mundo rural, do mundo da aldea... A aldea é unha maneira de vivir, de sentir, de convivir. É unha maneira de entender, de razoala vida e a morte. É unha maneira de crer”. Pero iso, non lle quita interese e posibilidades de uso para persoas que se movan en ambientes non rurais.

Este material “creado ó feliz abeiro da aldea” pode incitar “a outros a crear un material semellante desde a cidade irmá”.

Remato dicindo que coñezo, e por parte dunha comunidade parroquial, quen xa empregou este libríño como axuda para as celebracións do Nadal e como fonte de *reflexión* en reunións de grupo para revisar o ser cristián, o ser pobo, desde a fidelidade ó proxecto do Reino.

Unha vez máis igracias! ó autor.

**Hermelinda Dapena Tarela**